

AZIMIO LA KUMPONGEZA RAIS WA JAMHURI YA MUUNGANO WA TANZANIA, MHESHIMIWA DKT. JOHN POMBE JOSEPH MAGUFULI, KWA NAMNA ALIVYOLIONGOZA TAIFA KATIKA MAPAMBANO DHIDI YA JANGA LA UGONJWA WA CORONA (COVID-19)

(Kanuni ya 54 (1) ya Kanuni za Bunge Toleo la Januari, 2016)

Mheshimiwa Spika, kwa mujibu wa Kanuni ya 54(1) ya Kanuni za Kudumu za Bunge Toleo la Januari, 2016, naomba kuwasilisha Hoja kwamba Bunge lako Tukufu lijadili na kupitisha Azimio la Kumpongeza Rais wa Jamhuri ya Muungano wa Tanzania, Mheshimiwa Dkt. John Pombe Joseph Magufuli, kwa namna alivyoliongoza Taifa letu katika mapambano dhidi ya ugonjwa wa homa ya mapafu unaosababishwa na virusi vya *Covid-19* maarufu kama Corona.

Mheshimiwa Spika, awali ya yote nichukue nafasi hii kukushukuru wewe binafsi na ofisi yako kwa kuruhusu na kunipatia fursa hii adhimu ya kuwasilisha Hoja ya kutambua na kumpongeza Mheshimiwa Dkt. John Pombe Joseph Magufuli, Rais wetu kwa jitihada, mbinu, mikakati madhubuti aliyotumia katika kukabiliana na ugonjwa hatari wa Corona ambao umekuwa tishio kwa uhai na usalama wa wananchi hapa nchini na dunia nzima.

Mheshimiwa Spika, katika kukabiliana na ugonjwa wa Corona Rais wetu alitumia mbinu na mikakati mbalimbali ikiwemo kukataa kabisa kuiga mtindo (*fashion*) wa kufunga mipaka na kuwafungia wananchi wake wasitoke nje tofauti na viongozi wa Mataifa mengine waliofunga mipaka ya nchi zao na kuzuia watu wao kutoka nje (*lockdown*).

Mheshimiwa Spika, uamuzi wa kufunga mipaka na kuwafungia wananchi ndani sio jambo rahisi wala la kukurupuka kwani uamuzi wa namna hiyo ungeumiza sana uchumi wa wananchi na taifa letu kama ambavyo imetokea kwa mataifa mengine. Ndio maana Rais wetu hakufanya hivyo na badala yake alibuni mbinu na mikakati ya kipekee ya kukabiliana na janga la Corona.

Mheshimiwa Spika, Licha ya kutambua madhara ya kufunga mipaka na kuwafungia watu wetu ndani, wapo baadhi ya wanasiasa katika nchi yetu waliotaka Rais wetu aige mtindo huo ambao umesababisha mateso makubwa kwa wananchi kwenye nchi zilizotumia mtindo huo. Nafarijika kuona kwamba Rais wetu hakufanya hivyo kwa maslahi mapana ya usalama wa wananchi na nchi yetu.

Mheshimiwa Spika, katika kukabilana na janga la Corona Rais wetu ameonesha uongozi thabiti ambao umewezesha kukabiliana na maambukizi ya virusi vya Corona bila kuwatesa wananchi na bila kuathiri shughuli za kiuchumi za nchi yetu. Mathalani, mbinu na mikakati aliyotumia Rais wetu ilizingatia hali halisi ya uwezo wa kiuchumi wa wananchi ambao wengi wao kipato chao ni cha kujikimu *yaani hand to mouth on daily basis.*

Mheshimiwa Spika, kwa kuzingatia hali hiyo, Rais wetu aliruhusu shughuli za kiuchumi na baadhi ya shughuli za kijamii ziendeleo kwa tahadhari na kuwahimiza wananchi kuzingatia maelekezo na miongozo ya wataalam.

Mheshimiwa Spika, Mbinu na mikakati aliyotumia Rais wetu kukabiliana na janga la Corona ni pamoja na:

Mosi, kuunda Kamati Maalum iliyoongozwa na Waziri Mkuu na Kikosi kazi cha kudhibiti na kukabiliana na janga la Corona;

Mbili, kutenga hospitali na maeneo maalum ya kutoa huduma kwa watu walioambukizwa virusi vya corona;

Tatu, kufunga kwa muda shule za awali, msingi na sekondari, vyuo vya kati na vyuo vikuu;

Nne, kusitisha shughuli zote za michezo, mikusanyiko, warsha na makongamano;

Tano, kuwaondoa hofu watanzania na badala yake kuwataka wauchukulie ugonjwa wa corona kama magonjwa mengine jambo ambalo kwa kiasi kikubwa lilipunguza hofu na taharuki iliyokuwepo katika jamii;

Sita, kukemea unyanyapaa (*stigma*) kwa wagonjwa wa Corona na miili ya watu waliopoteza maisha kwa ugonjwa wa corona. Tulishuhudia Rais wetu akitoa tamko la kutaka wagonjwa wa corona wahudumiwe kama wagonjwa wengine. Aidha, Rais wetu aliekeza mamlaka zake kuruhusu ndugu kuzika miili ya watu wao waliopoteza uhai kwa ugonjwa wa corona kwa kufuata mila na desturi zetu;

Saba, kuruhusu shughuli za ibada kufanyika kwa kuzingatia miongozo iliyotolewa na WHO na wataalam wa Wizara ya Afya;

Nane, kumtanguliza Mungu kwa kuwaomba viongozi wa dini na kuwahimiza watanzania kufunga na kumwomba Mwenyezi Mungu aliepushe taifa letu na janga la ugonjwa wa corona; na

Tisa, kuwataka watanzania kutumia mbinu mbadala kama vile kutumia dawa za asili ikiwemo kujifukiza.

Mheshimiwa Spika, kutokana na mbinu na mikakati hiyo, taifa letu limeweza kuudhibiti ugonjwa wa corona ndio maana idadi ya wagonjwa na kasi ya kuenea kwa virusi vya corona imeshuka sana. Sasa hatuskii tena visa vipya vya wagonjwa wa corona wala vifo vinavyosababishwa na ugonjwa wa Corona.

Mheshimiwa Spika, hali hiyo imepelekea Rais wetu kuruhusu vyuo vifunguliwe kuanzia tarehe 1 Juni, 2020 na wanafunzi wa kidato cha sita kurudi mashuleni kujiandaa na mitihani yao ya taifa.

Mheshimiwa Spika, vilevile, Rais wetu ameruhusu shughuli mbalimbali za michezo na burudani ziendeleo kwa kuzingatia miongozo maalum inayotolewa na Wizara ya Afya. Hatua hii itarudisha furaha na kuimarisha afya za watu wetu baada ya kuwa kwenye kifungo cha kukosa burudani kwa kipindi ambacho shughuli hizo zilisimamishwa.

Mheshimiwa Spika, halikadhalika, Rais wetu ameruhusu kufunguliwa kwa anga la nchi yetu na hivyo kutoa fursa kwa ndege za kimataifa kuleta watalii na wawekezaji mbalimbali nchini. Hatua hii ni ishara tosha kwamba si muda mrefu uchumi wetu utarudi katika hali ya kawaida.

Mheshimiwa Spika, kutokana na upekee wa mbinu na mikakati ya kukabiliana na janga la corona iliyotumiwa na Rais wetu na kwa kuzingatia maelezo hayo ya utangulizi, naomba sasa niwasilishe Azimio la Kumpongeza Rais wa Jamhuri ya Muungano wa Tanzania, Mhe. Dkt. John Pombe Joseph Magufuli kwa namna alivyoliongoza Taifa katika Mapambano dhidi ya janga la ugonjwa wa homa ya mapafu unaosababishwa na virusi vya *Covid-19* kama ifuatavyo:

KWA KUWA, mbinu na mikakati aliyotumia Rais wetu kukabiliana na janga la corona ni mbinu rafiki na halisi kwa aina ya uchumi na maisha ya wananchi wetu;

NA KWA KUWA, mbinu na mikakati hiyo imesaidia kuwalinda wananchi na kuokoa maisha ya watu wengi waliougua ugonjwa wa Corona na kupunguza idadi ya vifo vinavyotokana na ugonjwa huo;

NA KWA KUWA, mbinu na mikakati aliyotumia Rais wetu imesaidia kulinda uchumi wa wananchi na uchumi wa nchi yetu;

NA KWA KUWA, mbinu na mikakati iliyotumiwa na Rais wetu imeipa nchi yetu sifa na kuwa mfano wa kuigwa (*model*) na baadhi mataifa makubwa duniani na jumuiya mbalimbali za kimataifa;

NA KWA KUWA, Rais na Serikali yake imeweza kukabiliana na janga la Corona kwa kutumia fedha zetu tofauti na nchi nyingine ambazo zimelazimika kukopa fedha nyingi kwa ajili ya kukabiliana na janga hili;

NA KWA KUWA, mbinu na mikakati iliyotumiwa na Rais wetu imewezesha shughuli za kiuchumi na baadhi ya shughuli za kijamii kuendelea kama kawaida;

NA KWA KUWA, mbinu na mikakati aliyotumia Rais imewezesha Bunge Kuendelea na majukumu yake ya kujadili na kupitisha Bajeti ya Serikali, Miswada ya Sheria na hoja mbalimbali muhimu kwa maisha ya wananchi na ustawi wa nchi yetu;

KWA HIYO BASI, Bunge hili la Jamhuri ya Muungano wa Tanzania katika Mkutano wake wa Kumi na Tisa, Kikao cha Arobaini na Moja cha tarehe 9 Juni, 2020 linaazimia kwa dhati kumpongeza Jemedari, Mhe. Rais Dkt. John Pombe Magufuli kwa namna alivyoliongoza Taifa na mbinu na mikakati aliyotumia kukabiliana na janga la ugonjwa wa homa ya mapafu unaosababishwa na virusi vya *Covid-19* maarufu kama Corona, mbinu na mikakati hiyo imefanya nchi yetu kutoyumba kiuchumi na kuwezesha shughuli za maendeleo kuendelea kama kawaida.

Mheshimiwa Spika, nakushukuru sana na naomba kutoa hoja.

Esther M. Mmasi (Mb)
VITI MAALUM (CCM)

09 Juni, 2020